

Galesia

Pol Galesia bin bi kirop mij ñu kil tikak

1 ¹Yad Pol, bi Jisas minim dad ameb alap midebin. Pen wög gipin nibak, bin bi ognap agel aka gos yad ke niñil ma gipin; Jisas Kraiss abe, Nap nop gek warikak ak abe, kiri apil mal nep ager gipin.

²Cin ai mam Kraiss eip midobin siñ aul, nibep ai mam Kraiss pis ar Galesia Propins midebim okok, “Nibi midebim?” agobin.

³Bapi God abe, Bi Kib cin Jisas Kraiss abe, nibep yimig niñil kod mider mid tep ginimib. ⁴Cin tap si tap timel gilig gi midonok pen Bi Kib cin Jisas Kraiss, Bapi cin God agak minim ak dil, tap si tap timel gipin okok acir ak lig gi yoknim, agil, cinop nen agil yur dil kimak. Kimak ak, bin bi tap si tap timel gipal nab okok midonok, cinop di komiñ yoknig kimak. ⁵Nib ak, God Bapi cin yib ne ak per per nep agon ar amnimiñ. Nib aknib rek tep.

Jisas cinop nen agil kimak minim tep nibak nep niñ din

⁶Yad gos par yib nipin. God nibep cib niñil, Jisas nop agek, nibep nen agil kimak ak pen kasek nep God nop kirig gil, minim tep ne ak kirig gil, minim kisen nib ke dopal ognap, minim aul minim tep, agil, niñ dinig gebim. ⁷Minim nibak, Kraiss minim tep ak mer; yokop bin bi ognap apil, minim esek ke nib ar ognap nibep agel, nibi sidol gil, “Minim nibak niñin aka?” gil gos ak nipim. ⁸Kraiss minim tep nibep ned ag ñinok ak, minim niñid yib ak ag ñinok. Pen cin ke aka ejol seb kab ar alañ nib alap apil, minim ke nib minim esek ognap nibep ag ñinigab ak, God bi nibak agek mab ke per yineb ak amil per per nep siñak midenigab ak tep. ⁹Minim nibak nibep kauyañ agebin. Bi alap apil, minim tep ned niñ dipek ak bak okok lil, minim ke nib minim esek ognap nibep ag ñenigab ak, God bi nibak agek mab ke per yineb ak am per per nep siñak midenigab ak tep.

¹⁰Minim agebin nibaul, bin bi okok yib yad ak agel ar amnañ, agil, ma agebin. God yip niñil miñ miñ ginimiñ, agil, agebin. Yad bin bi okok

kirop kañ kañ gilig gi ma agebin. Ti ginig: yad nig gil kañ kañ gilig gi apnep ak, Kraiss wög gi ñeb bi ne alap ma midebnepe.

God nep agek Pol wög ne goligip

¹¹Ai mam sikop. Yad nibep niñid agebin. Minim tep nibep ned ag ñinek ak, bin bi minim apal rek mer. ¹²Minim nibak, bi alap agek ma niñnek; minim nibak bi alap yip ag ñek ma ñinek. Jisas Kraiss ne ke nep yip miseñ ag ñek niñnek.

¹³Pen ned yad Juda bin bi gos niñöligipal rek gos niñöligipin ak, nibi nipim. God bin bi ne okok pis nep kimlañ, agil, yad kirop gi timel yib göligipin. ¹⁴Based sikop minim ak niñ dil, kilis yib göligipin; bi Juda yad eip adip adip kib ginok okok, kiri göligipal rek mer, yad nokim Juda lo minim niñ tep yib gil, based sikop agöligipal rek kilis gil göligipin.

¹⁵Pen ami yip ma tik dowak ñin ak, God yip yimig niñil di wög gi ñeb bi ne alap ag lak. Kisen kib gen, God ne ke tep gak ñin ak nep, ¹⁶Ñi yad Jisas Pol nop yomen, ne niñ tep gil, Juda bin bi mer okok kirop minim tep yad ak ag ñi tep ginigab, agil, Ñi ne yip yomek, niñ tep ginek. Nig gek, Jisas minim ak ti gep rek mideb, agil, bin bi ognap ma ag niñnek. ¹⁷Pen Jisas ned ag lek minim tep dad ameb bi ne midelak okok kirop niñnim, agil, Jerusalem ma amñinek. Yokop kariñ lim par kib Arebia am midil, adik gi apil, taun kib Damaskas midöligipin. ¹⁸Mi omal nokim yinek, Pita Jerusalem midek ak niñnig amil, ne eip ñin koñai ma kin midenek; yokop ñin akniñ ajip pis adañ (15) midenek. ¹⁹Pen yad bi Jisas minim dad ameb ognap sek ma niñnek; Pita eip Jisas nimam Jems eip kirop nep niñnek. ²⁰Minim ñu kil tikebin nibaul, God niñ mideb ak, nibep niñid yib agebin.

²¹Pen yad kisen Siria Propins amil, Silisia Propins amil, ginek. ²²Ned ñin nibak, bin bi Kraiss ken ar Judia kariñ lim sikol ke ke midelak okok uñin magil kiri ak yip ma niñlak ak ²³pen bin bi ognap minim yip ak yig damil aglak, “Bi Jisas minim tep ne ak ag juil, cinop gi timel gil goligip bi ak, miñi Jisas minim tep ak bin bi okok kirop ag ñi ajeb,” agel, ²⁴minim nibak niñil God yib ne ak agel ar amoligip.

Pol Kraiss minim tep dad ameb bi ognap eip mogim gil, minim ag jim ñilak

2 ¹Pen mid damil, mi yin akniñ wajrem pis adañ (14) yapek, mam Banabas cir mal, Taitas nop poñ dil Jerusalem amñinok. ²God yip miseñ agek Jerusalem amñinok. Amil, bin bi Jisas nop niñ dilak bi kib rek mideligipal okok eip am migan alap bisig gil, kiri tari rek agnimel, agil, Juda bin bi mer okok kirop minim tep tari rek ag ñöligipin minim nibak kirop ag yomnek. Wög ned ginek ak abe wög kisen ginigain ak abe ma yap pakniñ, agil, minim nibak kirop ag ñi tep ginek.

³Bi yad Taitas ne Grik nib ak pen nop wak tib gi rik ginigab agil ma aglak. ⁴Pen bi ognap esek agil, Krajs Jisas bi ne rek lil, kapkap apil cin eip ulik gil midelak. Pen cin Krajs Jisas nop cig midil, Juda lo minim ke ke ar ak ma gil, mid tep goligipin rek, kiri niñel, cibur kiri timel gak. Juda lo minim ke ke ar ak gilar, agil, apil minim esek nibak aglak. ⁵Pen Krajs minim tep ak minim niñid nep midenimiñ, niñil nibi minim niñid nibak nep niñ dñimib, agil, minim esek aglak nibak ma dinok.

⁶Pen bin bi Jisas nop niñ dilak bi kib rek mideligipal okok kiri yip minim ognap ma aglak. Bi kib rek agebin pen kiri bi kib aka bi sikol ak yip tap yokop rek lip. God ne bi kib di tep ginim bi sikol di tep ma ginim agil gos nibak rek ma niñip. ⁷Pen kiri niñlak, God ne Pita abe yip abe minim tep ne ag ñi ajep wög nibak ag lak. God Pita nop ag lek, wak tib gi rik gipal bin bi okok kirop ag ñi ajoligip rek ak, yip ak rek nep ag lek, wak tib gi rik ma gipal bin bi okok kirop ag ñi ajoligipin. ⁸Nib ak niñil me aglak, “God Pita nop kilis ne ñil kod midek niñlig gi, ne am wak tib gi rik gipal bin bi okok kirop Krajs minim tep dad ameb bi mideb rek, Pol nop ak rek nep kilis ne ñil kod midek niñlig gi, ne am wak tib gi rik ma gipal bin bi okok kirop Krajs minim tep dad ameb bi mideb,” aglak. ⁹Jems, Pita, Jon kirop bi kib apal bi okok, God yip wög nibak ñak niñlak ak me, wög cin ar nokim gipin, agil, Banabas cirop mal ñinmagil paklak. Niñ gil cin minim ag ar nokim linok niñil kiri aglak, “Banabas Pol bi omal amil Juda bin bi mer okok kirop Krajs minim tep ak ag ñir; pen cin am wak tib gi rik gipal bin bi okok kirop Krajs minim tep ak ag ñin,” aglak. ¹⁰Pen kiri minim nokim alap agil aglak, “Amil karip lim nib okok ajil, bin bi Jisas nop niñ dipal okok kirop agnimir, bin bi yim gep rek Jerusalem aul midebal okok kirop saköl ma ginimel; kirop mani ognap yoknimel,” aglak. Minim aglak nibak, yip tep gak ar ak nep aglak.

Pol Pita nop ag gak

¹¹Pen kisen Pita taun kib Adiok apil, ar aknib ke gek, gi tep ma gipan, agil, nop misen ag ginek. ¹²Tari ginig: ne ned Juda bin bi mer nab okok am midil, bin bi Jisas nop niñ dilak okok eip tap jim ñil ñiboligip. Pen kisen Jems bi ne ognap Jerusalem nib olak. Jems bi okok yip agnigal, “Bi wak tib gi rik ma gipal okok eip tari ginig tap ñibeban,” agnigal, agil, pirikil, kisen Juda bin bi mer okok eip tap ma niñak. ¹³Niñ gek, Juda bin bi ned ju amil karip lim nib okok midelak okok, Pita minim esek agak nibak niñil, ak rek nep gilak. Pen mam Banabas ak rek nep niñil, kiri gelak ar nibak kisen gak.

¹⁴Pen Jisas minim tep ak niñ kirig gelak ak niñil, bin bi okok magilsek niñ midel niñlig gi, yad Pita nop agnek, “Nak bi Juda nib ak pen Juda bin bi mer okok rek mideligipan. Pen miñi tari ginig ke asik lil, Juda bin bi mer okok kirop, cin Juda bin bi gipin gipin rek ginimib, agil, ageban?” agnek.

¹⁵Ami bapi cinop tik dolak ak, Juda bin bi tik dolak. Cinop Juda bin bi mer okok rek ma tik dolak. ¹⁶Pen cin Juda bin bi nipin, bin bi lo minim ar ak gel amek, God niñil, kirop bin bi komiñ tep yad agil ma agniñgab. Bin bi okok, Jisas Kraiss cinop nen agil kimak, agil, nop niñ dipal bin bi okok nep me, God niñil, bin bi komiñ tep yad, agniñgab. Cin ak rek nep lo minim ar ak gon amek, God niñek bin bi komiñ tep ne ma midobin. Kraiss Jisas cinop nen agil kimak, agil, nop niñ don niñlig gi, God niñek bin bi komiñ tep ne midobin.

¹⁷Gos cin nipin ak, Kraiss minim tep ak niñ don, Kraiss cinop di ne ke eip di jim ñi linigab ak me, God ne cinop bin bi komiñ tep yad agniñgab. Pen Kraiss minim tep ak niñil, cin bin bi magilsek tap si tap timel gipin ak miseñ nipin. Cin Juda bin bi nipin, Juda bin bi mer okok bin bi tap si tap timel gep midebal rek, cin ke ak rek nep midobin. Niñ gip ak, bin bi ognap agniñgal, Kraiss tap si tap timel gep nag ak gi kilis ginigab, agniñgal. Pen mer yib. ¹⁸Cin miñi nipin, Juda lo minim ke ke ageb rek gon, God wök pagil cinop bin bi komiñ tep yad midebim ma agniñgab. Cin miñi nipin minim nibak minim esek agep. Pen yad minim esek minim ned nib nibak kauyañ bin bi okok minim niñid rek ag ñinigain ak, yad tap si tap timel ginigain. ¹⁹Lo minim yip ñag pak lak niñil miñi yad cip se rek midil lo minim ak ma nipin. Pen miñi yad God nop tep ginimiñ ar ak nep ginim. Kraiss mab kros bak alañ ñag pak lilak ak, yipe Kraiss eip ñag pak lel kimnek. ²⁰God Ñi ne yip yimig niñil kimak ak, yad nop cig gil me, ne kimak ak, yad eip kimnek. Nib ak, nop cig gil, ned midöligipin rek ma midebin. Kraiss yad nab adañ komiñ mideb. Miñi komiñ yib midil, nop gos niñlig gi, yip gos ñib ar ak nep gipin. ²¹God ne bin bi okok kirop yimig niñil tau adik dak minim tep ak ma ag junigain. Bin bi okok lo minim ke ke ar ak gel amek, God niñil, kirop bin bi komiñ tep yad, apkop ak, Kraiss cinop nen agil kimak ak yokop kimbkop.

**Tap kil tep gipal rek mer; Jisas nop cig gil
me, God eip jim ñil midonigabin**

3 ¹Galesia bin bi, nibi gos tep ma mideb. Bi an gek nibep saköl sek lip. Cin Jisas Kraiss nop mab kros bak alañ ñag tibik lilak minim tep ak ag ñi tep gon nipek. ²Pen yad nibep minim nokim alap ag niñebin. Nibi ned tari tari gem, God ne Kaun ne ak nibep ñak? Nibi lo minim ageb rek gem, God ne Kaun ne ak nibep ñak aka nibi minim tep ag ñinok ak niñ dem, God ne Kaun ne ak nibep ñak? ³God Kaun ak nop dil me, nibi bin bi komiñ tep ne midebim ak pen miñi saköl ñagek, kilis cin ke gil mid tep ginigabin, agil, nipim ar? ⁴Ned Kraiss nop niñ dem, nibep gi timel yib gelak ñin ak, nop ma kirig gipek. Pen miñi tari ginig, lo minim alap agel, minim kiri nibak dil, Kraiss nop kirig ginig gebim? ⁵Yip agem niñin. Nibi lo minim ageb rek gem, God ne Kaun ne ak nibep ñil tap ma gep rek nab

nibi okok gip aka nibi Kraiss minim tep niñil niñ dem, God ne Kaun ne ak nibep ñil tap ma gep rek nab nibi okok gip?

⁶Pen Ebrahim nop gos niñnimib. God Minim ak ñu kil tikil aglak, “Ebrahim God minim agak ak niñ dak ak niñil God nop, bi komiñ tep yad, agak,” aglak.

⁷Nib ak, nibi niñim. Bin bi God Minim ageb ak niñil, “Niñid ageb,” agil niñ dipal okok, Ebrahim tidig ne midebal. ⁸God Minim birarik okok agak, Juda bin bi mer okok, God minim ageb ak niñ del, God kirop bin bi komiñ tep yad agnigab, agak. Ar nibak nep, God Minim birarik nep Kraiss minim tep ak Ebrahim nop agak, “Nak mideban ak me, God ne bin bi okok magilsek tap tep ñinigab,” agak. ⁹Ebrahim God minim agak ak niñ dek, God nop di tep gak rek, bin bi God Minim ageb ak niñil, niñid ageb agil niñ dipal okok, kirop ak rek nep di tep ginigab.

¹⁰Pen bin bi lo minim ar ak nep niñil gon, God cinop dinigab, apal bin bi okok, yur kib yib dinigal. Tari ginig: God Minim ak ñu kil tikil aglak, “Bin bi an, God lo minim ñu kil tiklak tiklak rek magilsek kisen ma ginigab ak, yur kib dinigab,” aglak.

¹¹Pen minim alap God Minim ñu kil tikil aglak, “Bin bi yip niñ dipal okok nep me, bin bi komiñ tep yad midil komiñ midenigal,” aglak. Nib ak nipin, bin bi lo minim ar ak nep niñil gel amnigab okok, God bin bi komiñ tep yad, agil, kirop ma dinigab. ¹²Pen lo minim ageb rek gep ak ke, Kraiss minim tep ak niñ dep ak ke. Bin bi lo minim ageb rek kilis cin ke ginigabin agnigal ak, sidol ginigal. God Minim ñu kil tikil aglak, “Bi lo minim ke ke magilsek kisen ginigab bi nibak me komiñ amnigab,” aglak. ¹³Cin God lo minim ar ak gi mer niñil, yur kib dinig ginok ak pen Kraiss yur kib nibak dil cinop tau adik dak. God Minim ñu kil tikil aglak, “Mab bak alañ ñag pak lel kimnigal bi okok, God ne ke pen ñek, yur dinigal,” aglak. ¹⁴Pen Kraiss cinop tau adik dak ak, God Ebrahim nop minim tep agak ak, Kraiss Jisas gek Juda bin bi mer okok tap tep nibak dinimel agil, nig gak. Juda bin bi mer okok minim tep nibak niñ del, God ne Kaun ne cinop Kraiss bin bi ne ñinigain agil, nig gak.

Lo minim ak ke; God ginigain agil ag lak minim ak ke

¹⁵Ai mam sikop. Yad nibep minim alap agnim. Bi ognap minim ag ar nokim lil, agnigal rek nep ginigal. Bi alap apil minim tib rikil abramek ma ginigab. ¹⁶God ne Ebrahim eip ñi ne eip minim niñid ag lep agil agak ak, God Minim nibak ñu kil tikil, “Ñi okok eip,” ñu kil ma tiklak; “Ñi nak ak eip,” ñu kil tiklak. Ñi nokim aglak nibak, Kraiss nop nep aglak. ¹⁷Pen yad agebin ak, God Ebrahim nop ginigain agil ag lak minim ak, mi konjai nep (430) mid damil, kisen God lo minim ak ñak. Lo minim kisen ñak nibak, titi gil minim niñid ag lep ned agak ak tap yokop rek lig gi yok ke okok yoknigab? Niñ ma ginigab. ¹⁸Pen bin bi lo minim kisen gel God tap tep ñibkop ak, God ned nig ginigain ag lak minim

ak gos niŋlig gi midil tap tep ma ñibkop. Pen God ne Ebrahim nop ned ag lak minim nibak nep gos niŋlig gi midil, ne ke Ebrahim nop ag lak rek nep gak.

¹⁹Pen nibi agnigabim, “God Ebrahim nop tap tep ag lak ak yokop ñib ak rek, God ne tari ginig lo minim ñak?” agnigabim. Pen God ned yib Ebrahim nop minim kilis niŋid ak ag lak; kisen yib Ñi agak nibak owak. Pen ñin nab siŋak bin bi tap si tap timel ke ke göligipal rek, kiri timel göligipal ak niŋnimel, agil, God kirop lo minim ak ñak. Pen lo minim ak, God ejol okok nep dap bi alap nop ñelak, ne pen dam bin bi okok kirop ag ñak. ²⁰Pen Ebrahim Ñi ne ginigab minim agak nibak minim kib yib ak me, God ne ke apil Ebrahim nop ag ñak.

Lo minim ak cinop gos timid ukip

²¹Nibi gos alap niŋil agnigabim, “God cinop minim omal agak. Pen lo minim agak minim nibak eip, yad ginigain agil minim kilis niŋid ag lak minim nibak eip, adip adip ma mideb,” agnigabim. “Minim nib omal ke ke mideb,” agnigabim. Pen minim ke ke mer. God bin bi komiŋ midep lo minim alap agobkop, cin lo ar nibak nep niŋil gon, God ne niŋil cinop bin bi komiŋ tep yad apkop. Pen lo nibak rek ar alap ma agak. ²²God Minim ñu kil tiklak rek nep mideb. Bin bi kariŋ lim okok magilsek tap si tap timel ar ak gel gel, gac nibak kirop kom kam gek, ke komiŋ amnimel rek ma lip. Pen bin bi Jisas Kraiŋ nop niŋ diŋigal okok, God ginigain agil ag lak rek, tap tep agak nibak kirop ñinigab.

²³Pen Kraiŋ ma owak ñin ak, nop ma niŋ diŋok ak me, lo minim cinop bi nagiman wari migan nab eyaŋ midebal rek ak, gi kis kis gak. ²⁴Cinop kis kis gil, gos timid uk damil, gos ñek niŋlig gi midon, Kraiŋ apek, minim tep ne ak niŋ don, God cinop bin bi komiŋ tep yad agip. ²⁵Kraiŋ minim tep ak niŋ dipin ak me, miŋi lo minim cinop gos timid uk dam ma gip.

Nibi God ñi pai ne midebim

²⁶Nibi Kraiŋ Jisas nop niŋ dipim ak me, nibi magilsek God ñi pai ne midebim. ²⁷Nibi ñig pakil Kraiŋ nop cig gipim ak me, ke kisen nib Kraiŋ ne ke rek ulek lipim. ²⁸Nib ak, Juda wagiŋ ak ke, Griŋk wagiŋ ak ke ma midebim; bin bi miŋ wög gipim okok ke, bin bi gos nibi ke niŋil gipim okok ke ma midebim; bin wagiŋ ak ke, bi wagiŋ ak ke ma midebim; nibi Kraiŋ Jisas bin bi ne midebim rek, wagiŋ nokim yib midebim.

²⁹Nibi bin bi Kraiŋ pis ar midebim okok, nibi Ebrahim bin bi wagiŋ ne midebim, niŋil God Ebrahim nop minim kilis niŋid ag lil ginigain agak ak, nibep ak rek nep ginigab.

Kraiŋ nep gek God ñi pai ne midobin

4 ¹Minim yad agebin ak nig gil mideb: bin bi okok kimel, ñi pai kiri kisen kib gil tap kiri okok diŋigal. Pen ñi pai sikol midil ma

dinigal; kib gil nep me kiri tap nib okok magilsek dinigal. Nib ak, ñi pai nib okok tap koñai mideb ak pen kiri ñi pai sikol midebal rek, kiri bin bi miñ wög gipal rek nep midebal. ²Pen bin bi ñi pai nib okok kirop kod midebal okok, nib nib ginimib, agil, ag damil, mani tap kiri okok kod midel midel, nap ag lak ñin ak nep, tap kiri nib okok dipal. ³Pen nib aknib rek nep, cin ñi pai sikol rek midil gos niñ tep ma gil, kijeki, cip saj, tap tari tari okok minim tari aglak ak dil, kirop bin bi miñ wög gep rek midoligipin. ⁴Pen God ag lak ñin ak bir owak ak me, God Ñi ne ak nop ag yokek, Juda bin alap Ñi nibak nop tik dowak. Tik dapek, ne Juda lo minim ar ak niñil, mid damil, ⁵Juda bin bi lo minim nipal okok kirop tau adik dak. Kirop tau adik dak ak, cin God ñi pai ne yib rek midonigabin agil gak. ⁶Nibi ñi pai ne yib midebim rek, God ne Ñi ne Kaun ne ak ag yokek, Kaun ak apil cinop bak goñ lip ak me, God nop “Aba,^a Bapi,” apin. ⁷Nib ak, nibi bin bi, Seten nop bin bi miñ wög gep rek mideligipim okok, miñi God ñi pai ne midebim ak me, God ñi pai ne kirop minim kilis niñid ag lil, “Nibep tap tep okok ñinigain,” agak minim ak, minim nibi yib.

Pol Galesia bin bi, “Nibep gos par niñebin,” agak

⁸Pen ned God nop ma niñ döliligipim ñin ak, nibi bin bi miñ wög gep rek midil, tap esek okok sobok gilig gi, piriklig gi, gi mid damil, mid tep ma göligipim. ⁹Pen miñi God nop niñ dipim. Pen nibi God nop piyo niñil ma dipim; ne nep nibep niñil dip. Pen tari ginig nibi adik gi amil, ned gi timel göligipim rek kauyañ ginig gebim? Gipim nibak, kauyañ bin bi miñ wög gep okok rek koslam midon, agil, gipim aka? ¹⁰Per ñin kib apal ak nep niñil, takin kib apal ak nep niñil, pib kib apal ak nep niñil, mi kib apal ak nep niñil gipim. Nig gil, gi timel gipim. ¹¹Nib ak, yad minim tep nibep ag ñen nipek ak, miñi kirig ginimib rek lip, agil, nibep gos par niñebin.

¹²Ai mam sikop. Yad nibep yimig niñil agebin! Yad ned Juda lo minim niñöligipin rek kirig gil, nibi yokop mideligipim rek midebin ak, nibi ak rek nep lo minim nibak kirig gil, yad midebin rek midenimib. Ned nibi yip gi timel ma gipek. ¹³Nibi nipim, ned yip tap gak ak me, yad am karip lim nibi siñak kin midil, nibep minim tep ak ag ñinek. ¹⁴Yip tap gek ak, nibi koslam midebek pen yip yirik niñil, ma kirig gipek; God ejol alap aka Krai Jisas nop ke di tep gipkep rek ak, yip aknib rek nep di tep gipek. ¹⁵Nibi ned miñ miñ yib gil yip di tep gil, yimig niñil, uñin magil nibi okok tig ju yip ñeb rek lipkop, abramek tig ju ñibkep. ¹⁶Pen miñi yip tari ginig kirig gipim? Minim niñid agen ar ak niñem nibep milik yapek yip yirik nipim aka?

¹⁷Bin bi nibep timid ukpal okok, kiri gos timel niñil nig gipal. Pol bi okok kirig gil, minim cin apin ak nep kisen ginimib, agil, nig gipal. ¹⁸Bin

^a 4:6 Jisas Arameik minim agoligip. “Aba” agak minim magil nibak wagin ak “Bapi.”

bi kilis gil nibep gi tep ginigal ak tep. Pen kiri per nep nig genimel. Yad nibep eip midenigain ñin ak abe, par okok midenigain ñin ak abe nibep gos niñil gi tep ginigal ak tep. Pen yad par okok midenigain ñin ak nibep tom apal ak, tep ma gip.

¹⁹Pen ñi pai midmagil yad okok. Ned, “Krais minim tep ak ag ñen, niñ del, Krais kirop nab adañ miden,” agil, nibep ag ñi tep göligipin ak, bin okok ñi pai tik donig gel, yur kib gip rek ak, yip gak. Pen miñi kauyañ Krais nibep nab adañ miden, agil, nibep ag ñi tep gebin ak, bin ñi pai tik donig gel, yur gip rek ak, yip kauyañ geb. ²⁰Yad nibep eip midebnep ak, minim akal dil agnim, agil, piyo nipnep ak, pen par siñ aul midebin ak me, yad nibep gos par niñen, gos yad abic gek apeb.

²¹Pen nibi lo minim nep niñin, apim okok, lo minim ognap ma niñnimib rek lip. ²²Minim nibak ñu kil tikil aglak, “Ebrahim ñi omal tik dowak. Ñi ne alap, bin praj alap Ebrahim bine ak nop miñ wög goligip bin ak nop dil tik dowak; ñi ne alap, bin miñ wög ma goligip bin ak nop yipid gil dil tik dowak,” aglak. ²³Bine miñ wög goligip ñi tik dowak ak, ñi pai tik dopal rek nep tik dowak; pen bin miñ wög ma goligip bin yipid gil dak bine ak, ñi pai womleb midil, God Ebrahim nop ñi alap tik donigan agil minim kilis niñid ag lil agak rek, ñi alap tik dowak.

²⁴Kesim ar nibak rek, minim ognap bak okok mideb. Bin omal, minim kilis niñid ag lep omal. Minim kilis niñid ag lep alap Sainai Dim nib apil, ñi pai tik dapek kiri miñ wög gilig gi nep midenigal; Hega me ak. ²⁵Bin Hega ne Sainai Dim karip lim Arebia siñak rek me. Ne taun kib Jerusalem miñi mideb ak rek mideb. Tari ginig: Jerusalem abe ñi pai ne abe miñ wög gipal. ²⁶Pen Jerusalem seb kab ar alañ mideb siñak, bin bi miñ wög gil ma amnigal. Karip lim nibak ami cin.

²⁷Birarik nep kimep alap God Minim ñu kil tikil aglak,

“Bin ñi pai womleb ñi pai ma tik dowip ak,
miñ miñ yib ginigab.

Bin ñi pai tiknig gek ma niñib ak,
tep gek niñlig gi, miñ miñ ginigab.

Bin ñi pai womleb ak,
wagin ne kib midenigab;
pen bin nigmil eip ajöligipir ak,
wagin ne kib ma midenigab,” aglak.

²⁸Ai mam sikop. God ne minim kilis niñid ag lek, Sera Aisak tik dowak. Pen nib aknib rek nep, God minim kilis niñid ag lek, nibi ñi pai ne midebim. Nib ak, nibi Aisak rek midebim.

²⁹Ñin nibak, Ebrahim ñi ne bin bi ñi pai tik dopal rek nep tig dowak ñi ak, warikil, nimam adik God Kaun gek tik dowak ak nop niñek, milik yapek, gi timel gak. Nib ak rek, miñi Juda bin bi lo minim nipal okok, cinop bin bi Jisas nop niñ dipin okok ak rek nep gipal.

³⁰God Minim ak ñu kil tikil aglak, “Bin wög gi ñeb amil mal kirop ag yokan. Bin miñ wög gi ñeb ñi ne ak, bin yipid gil dil ñi tik donak ak, tap ne ognap ma dinigab,” aglak.

³¹Nib ak, ai mam sikop niñim! Cin bin miñ wög goligip ñi pai ne rek ma midobin; cin bin miñ wög ma goligip bin yipid gil dak ak, ñi pai ne rek midobin.

**Miñ midonok, Krais cinop tau adik dak ak
me, Juda lo minim okok lo cin mer**

5 ¹Krais cinop pis nep tau adik dak ak, kisen Juda lo minim alap cinop minim kib ma agnimiñ, agil, cinop tau adik dak. Krais nig gak ak gos niñlig gi nep midenimib; ned Juda lo minim ak bi kib nibi rek lek, nop bin bi miñ wög gep rek mideligipim ak kauyañ ma adik gi amnimib. ²Yad Pol nibep minim agebin aul niñ tep ginimib! Juda kai minim cin dinimib apal okok kirop yau agem, wak nibep tib gi rik genigal ak, kisen Krais nibep gi ñinimiñ rek ma linigab. ³Yad nibep kauyañ ag tep ginigain! Bi okok minim cin dinimib apal okok kirop yau agem, wak nibep tib gi rik genigal ak, kisen nibi Juda lo minim ak magilsek dil kisen ginimib. ⁴Nibi, “Juda lo minim kisen gon amek, God cinop niñil, ‘Bin bi komiñ tep yad,’ agniñab,” ag gos nipim bin bi okok, Krais nop kirig gipim; bin bi ne ma midebim. Nibi nig gil nipim rek, Krais nibep yimig niñil dinimiñ rek ma lip. ⁵Pen God Kaun cinop nab adañ mideb bin bi okok, God cinop niñil, “Bin bi komiñ tep yad,” agniñab ñin ak kod midil tep gek niñlig gi, gos sek midobin. ⁶Bin bi Krais Jisas nop cig midebal okok, wak tib gi rik gipal aka tib gi rik ma gipal ak tap yokop. Tap kib nokim nep mideb: Krais nop niñ dil, bin bi okok kirop midmagil lin.

⁷Nibi ned tag tep göligipim ak pen miñi bi an nibep kanib binem tikip niñil minim niñid ak kirig gipim? ⁸God nibep kanib binem tikip niñil minim niñid ak ma kirig gipim. Ne nep me nibep sik ageb. ⁹Bin bi okok tap yis apal ak minim alap agil apal, “Yis sikol eñap plaua tin kib eyañ sek lel, yis nibak ke amek amek plaua nibak kib yib tanniñab,” apal. ¹⁰Krais eip jim ñil midobin ak me, yad nipin minim yad agesin nibaul nibi ke nib akniñ rek nep niñniñabim. Pen bi an ne apil minim esek agek, nibi gos alap alap nipim ak, bi nibak minim kib niñil pen yur dinigab.

¹¹Pen ai mam sikop niñim! Krais bin bi niñ dipal okok kirop wak tib gi rik ginimib apnep, bi okok yip gi timel ma giplap. Yad wak tib gi rik ginimib apnep, Krais ne bin bi okok nen agil mab kros bak alañ kimak minim tep nibak niñel milik ma yopkop. ¹²Pen gos yad, bi minim esek agel sidol gipim bi nib okok kirop ke pis nep tib gi rik ginigal ak tep!

¹³Pen ai mam sikop. Krais cinop pis nep tau adik dak ak, kisen Juda lo minim alap cinop minim kib ma agnimiñ, agil, cinop tau adik dak.

Pen gos nibak niñil, gos nibi ke niñil, abramek ma ginimib; bin bi okok kirop yimig niñil, di tep ginimib. ¹⁴God lo minim ak magilsek di jim ñil, minim ar nokim alap nep mideb: “Nak ke midmagil lipan rek, bin bi ke nib okok kirop ak rek nep midmagil linimin.” ¹⁵Nib ak, nibi ke niñ tep ginimib. Kaj kain okok gipal rek milik yapek, pen pen ginigabim ak, magilsek ap yap paknigabim.

Gos ke nipim ar ak kirig gil, God Kaun gos ñeb ar ak nep ginimib

¹⁶Nib ak, nibep agebin, God Kaun gos ñeb ar ak nep ginimib. Nig genigabim me, gos nibi ke niñil, tap si tap timel göligipim ar ak kirig ginigabim. ¹⁷Gos nib omal, alap pis kid lip gi damek, alap pis kid lip gi damek ak me, tap gin agnigabim ar ak ginimib rek ma linigab. ¹⁸Pen God Kaun nibep gos ñek niñlig gi gem amek, Juda lo minim okok lo nibi mer. ¹⁹Pen bin bi gos kiri ke niñil gipal ar ak, bin si bi si gil, abramek gi ajil, gi timel yib gil; ²⁰tap yokop god esek okok sobok gil, kij gil, kiyob pakil; bin bi okok kirop milik kal niñil, pen pen gil, tap kiri okok yad rek ma mideb agil, cibur timel gek, yad ke bi kib midenim agil, pen pen agil, am ke ke asik lil, ²¹tap kiri okok yad rek midobkop, agil; ñig kilis ñibil saköl ñagil, tap magil koñai nep ñibil, tap timel niñep ma niñep gil, gi timel yib gipal. Yad nibep ned agnek minim ak miñi kauyañ agebin: bin bi nibak rek gipal okok, God kirop dil ma kod midenigab.

²²Pen bin bi God Kaun kirop gos ñek niñlig gi gel ameb okok, bin bi okok midmagil lil, miñ miñ gil, cibur sain sain midil, bin bi ognap okok yimig niñil, gi tep gil, minim kiri ke agnigal ak ar nibak rek nep gil, ²³bin bi ognap eip minim sisain agil di tep gil, bin bi ognap kirop gi timel gel, pen kal ma junigal. Nig genigal ak, lo minim alap kirop minim kib ma agnigab.

²⁴Krais Jisas bin bi ne okok, gos ke niñil abramek goligipin nag ar nibak kirig gipin. Nag ar goligipin nibak, mab kros bak alañ Krais Jisas eip kimak. ²⁵Nib ak, God Kaun ak nep cinop komiñ kisen nib ñek, komiñ midobin ak me, God Kaun tap tari cinop agniñiñ ak, nib aknib rek nep gin. ²⁶Pen cin ke yib kib miden, agil, pen pen agil, tap kiri okok tap yad rek midobkop, agil, gos ma niñin.

Bin bi okok midmagil lil, gi tep ginimib

6 ¹Ai mam sikop. Bin bi cin ognap tap si tap timel ar ognap genimel ak, nibi bin bi God Kaun nibep nab adañ mideb bin bi okok kirop minim sisain agil, ag tep gem, kauyañ mid tep genimel. “Ñin ognap cin ak rek nep gijin rek lip,” agil, niñ tep ginimib. ²Bin bi cin ognap miker denimel, kirop yimig niñil kod midem, mid tep genimel. Nig ginigabim ak, Krais lo ne ageb rek ginigabim. ³Cin ke tap tep alap ma mideb. Bin bi ognap, cin ke bin bi tep agnigal ak, minim esek agnigal. ⁴Bi nibak bi tep

aka yad bi tep, agil, gos ak ma niñnimib; yad ke gi tep gipin aka gi tep ma gipin agil, gos ak nep niñnimib. ⁵Tari ginig: cin nokim nokim miker ke ke mideb rek niñil, tari tari gil mid tep ginigabin ak, ke niñ tep gin.

⁶Pen bin bi Kraiss minim tep ag ñibal okok, bin bi minim nibak nipal okok, minim ag ñeb bin bi nib okok kirop saköl ma ginimel; tap tep kiri mideb okok kirop ognap nonim li ñinimel.

⁷Pen, God bi saköl, yad tap si tap timel ginigain ne ma niñnigab, agil, ma niñnimib. Ginigabin rek, cinop pen ak rek nep ginigab. Cin nipin, tap yimnigabin rek nep pag donigabin; tap ke ognap ma pag donigabin. ⁸Nib ak, gos cin ke nipin rek tap yimin agnigabin ak, kanib timel amlig gi, pis nep yap pakil, mab per yineb ak pag donigabin. Pen God Kaun gos ñeb rek tap yimin agnigabin ak, God Kaun ak cinop gek, komiñ per midep won ak nep pag donigabin. ⁹Nib ak, yirik niñil, gi tep gipin ak ma kirig gil, kilis gi tap yimil, ñin kisen ak tap magil tep pag donigabin. ¹⁰Pen tap ñiñeb nibak wös ma gip ñin aul, bin bi Kraiss pis ar midebal okok kirop di tep gep rek lenigab ak, di tep gin. Pen bin bi ke nib okok kirop ak rek nep magilsek di tep gin.

Kraiss cinop nen agil mab kross bak alañ kimak ak nep tap kib yib

¹¹Yad agen, mam alap mij nibaul ñu kil tikeb. Pen miñi ñinmagil yad ke ñu kil tikebin ak me, minim magil kib kib rek ñu kil tikebin.

¹²Bi mib goñ nep niñil, ak tep, ak timel, apal bi okok, kiri kilis gil wak tib gi rik ginimib apal. Kraiss mab kross bak alañ kimak minim ak nep agon, bi Juda ognap kabiam juil, cinop gi timel ginigal, agil me, nib apal. ¹³Wak kiri ke tib gi rik gipal ak pen Juda lo minim okok magilsek kisen ma gipal. Nibep wak tib gi rik ginimib apal ak, kisen kiri miñ miñ gil, Juda bi okok ognap kirop agnigal, “Cin agon minim cin dil mib goñ kiri nib nib gipal,” agnigal. ¹⁴Pen yad tap nokim alap nep gos niñil miñ miñ gipin: Jisas yip nen agil, mab kross bak alañ kimek, yad eip kimnek rek lip ak niñil me, miñ miñ gipin. Ne eip kimnek nibak, bi pis nep kimib rek ak miden, bin bi lim dai wagin aul nib tap kiri miñ miñ gipal tap okok, yip tep ma gip. Pen bin bi nib okok ak rek nep yip niñel, yad tap yokop alap rek lek, bi pis nep kimib bi alap rek midebin.

¹⁵Wak tib gi rikip aka tib gi rik ma gip ak tap yokop. Pen God gek, bin bi kisen nib lil, bin bi ne midobin ak tap yib. ¹⁶Minim agesin kisen gipim bin bi okok abe, God bin bi ne okok magilsek abe, God nibep yimig niñil di tep gek niñlig gi nibi kapkap mid tep gi midenimib.

¹⁷Yad minim magil nokim alap mideb ak, nibep agniñ gebin. Jisas minim tep ak agen, yip paklak kiñaun okok mideb ak me, bi ognap apil yip miker ognap ma ñinimel.

¹⁸Ai mam yad okok. Bi Kib cin Jisas Kraiss nibep yimig niñil, kod midonimiñ. Nib aknib rek tep.